

ERINDISBRÉF FAGNEFNÐAR SKÓLABÚÐANNA Á REYKJUM.

Stjórnskipuleg staða.

Fagnefnd Skólabúðanna á Reykjum heyrir beint undir sveitarstjórn Húnaþings vestra. Sveitarstjóri starfar með fagnefndinni.

Skipan fagnefndarinnar.

Í fagnefndinni eiga sæti þrjú fulltrúar, kosnir af sveitarstjórn að afloknum sveitarstjórnarkosningum. Kjörtímabil fagnefndarinnar er hið sama og sveitarstjórnar. Auk kjörinna fulltrúa situr sveitarstjóri fundi nefndarinnar. Þá á fulltrúi Skólabúðanna á Reykjum rétt til setu á fundum nefndarinnar með málfrelsi og tillögurétt. Fagnefndinni er heimilt að kalla til sín sérhvern þann sem tengist málum sem fjallað er um. Fagnefndin kys sér formann á fyrsta fundi sínum, nema sveitarstjórn ákveði annað.

Hlutverk.

Hlutverk fagnefndarinnar er:

- að hafa eftirlit með að Reykjatangi ehf. uppfylli ákvæði samnings við Húnaþing vestra um rekstur skólabúðanna.
- að hafa faglegt eftirlit og umsjón með starfsemi skólabúðanna.
- að afgreiða breytingar á þáttökugjöldum umfram verðlagsbreytingar.
- að hafa eftirlit með því að starfsáætlun skólabúðanna sé haldin.
- að vera sveitarstjórn að öðru leyti til ráðgjafar í málefnum skólabúðanna.

Starfshættir.

Um starfshætti nefnda er sérstaklega getið í IV. kafla samþykktar um stjórn og fundarsköp Húnaþings vestra og skal þeim fylgt eftir því sem við á. Fagnefndin kemur saman fyrir luktum dyrum á fastákveðnum fundartíma að minnsta kosti fjórum sinnum á ári. Fagnefndin skal halda gerðabók. Ritari skal færa fundargerð í gerðabókina. Í gerðabók skal skrá hvar og hvenær fundur er haldinn og hverjir sitja hann. Þá skal skrá einstök mál, sem tekin eru fyrir á fundi, dagsetningu þeirra, nöfn aðila, meginefni og hvaða afgreiðslu það hlýtur.

Í fundarlok skal fundargerð lesin upp og allir viðstaddir fagnefndarfulltrúar undirrita hana. Fagnefndin getur ákveðið að fundargerðir verði skráðar í tölvu og skal það þá gert í samræmi við 31. gr. í samþykktum um stjórn og fundarsköp Húnaþings vestra. Sveitarstjóri hefur umsjón með ritvinnslu fundargerðar. Sveitarstjóri sendir fundarmönnum afrit af fundargerð nefndarinnar.

Sveitarstjóri sér um að boða fundi fagnefndarinnar í samráði við formann og sjá þeir sameiginlega um undirbúning nefndarfunda. Fundarboðun skal vera skrifleg og tilgreina fundarstað, tíma og dagskrá og send fagnefndarfulltrúum og öðrum sem seturétt hafa á fundum eigi síðar en þremur sólarhringum fyrir fund.

Formaður stýrir fundum fagnefndar samkvæmt IV. kafla samþykktar um stjórn og fundarsköp sveitarfélagsins.

Fundur telst ályktunarhæfur ef meirihluti nefndarinnar er mættur á fund. Í atkvæðagreiðslu ræður afl atkvæða. Mál telst fallið í atkvæðagreiðslu ef atkvæði falla að jöfnu með og á móti.

Eftirfylgni

Formaður fagnefndar og aðrir nefndarmenn skulu snúa sér til sveitarstjóra með eftirfylgni samþykktar nefndarinnar, sem staðfestar hafa verið af sveitarstjórn.

Réttindi og skyldur

Um réttindi og skyldur fulltrúa í fagnefndinni gilda ákvæði sveitarstjórnarlaga og samþykktir um stjórn og fundarsköp Húnaþings vestra, eftir atvikum.

Fulltrúa í fagnefndinni er skylt að sækja fundi nema lögmæt forföll hamli. Skal hann láta formann eða sveitarstjóra vita um forföll með góðum fyrirvara.

Hver fulltrúi á rétt á að koma máli á dagskrá fundar, enda skilar hann efni þess til formanns eða sveitarstjóra a.m.k. fjórum sólarhringum fyrir fund.

Fulltrúar skulu hafa hag sveitarfélagsins að leiðarljósi við störf sín en eru ekki bundnir af öðru en sannfæringu sinni, lögum og samþykktum um stjórn og fundarsköp Húnaþings vestra í atkvæðagreiðslu um málefni í nefndinni.

Fundarmenn eru bundnir þagnarskyldu vegna mála sem þeir fá vitneskju um í starfi sínu fyrir fagnefndina og ætla má að leynt eigi að fara samkvæmt eðli málsins, lögum eða samþykkt 2/3 hluta fulltrúa hvort sem þau varða einka- eða almannahagsmuni.

Fulltrúi í fagnefndinni skal víkja af fundi við umræður og afgreiðslu mála sem varða hann sjálfan, skyldmenni hans eða nánustu venslamenn svo mjög að ætla má að það móti viljaafstöðu hans að einhverju leyti. Honum er þó heimilt að gera stuttlega grein fyrir afstöðu sinni áður en hann víkur af fundi.

Samþykkt á fundi fagnefndar 9. janúar 2007

Staðfest af sveitarstjórn Húnaþings vestra 18. janúar 2007